

## PRIJEDLOG

Na osnovu člana 24. stav 1. tačka c) Ustava Tuzlanskog kantona («Službene novine Tuzlansko-podrinjskog kantona» broj: 7/97 i 3/99 i «Službene novine Tuzlanskog kantona» broj: 13/99, 10/00, 14/02, 6/04 i 10/04), na prijedlog Vlade Tuzlanskog kantona, Skupština Tuzlanskog kantona, na sjednici održanoj \_\_\_\_\_ godine, d o n o s i

### **Z A K O N** **O POTICAJIMA ZA ZAPOŠLJAVANJE I INTERVENCIJAMA U PRIVREDNIM** **SUBJEKTIMA**

#### **I OPĆE ODREDBE**

##### **Član 1.**

##### **(Predmet zakona)**

Ovim zakonom utvrđuju se izvori sredstava za poticaje u zapošljavanju i intervencije u privrednim subjektima, svrha za koju se sredstva iz tih izvora koriste, instrumenti obezbjeđenja, kao i pitanje nadzora nad provođenjem ovog zakona.

##### **Član 2.**

##### **(Cilj zakona)**

Cilj ovog zakona je smanjenje nezaposlenosti i oživljavanje proizvodnje na području Tuzlanskog kantona ( u daljem tekstu: Kanton).

#### **II IZVORI I KORIŠĆENJE SREDSTAVA**

##### **Član 3.**

##### **(Izvori sredstava)**

(1) Sredstva za poticanje zapošljavanja u privrednim subjektima obezbjeđuju se iz dobrovoljnih priloga zaposlenih lica, donacija domaćih i stranih pravnih i fizičkih lica, i drugih izvora.

(2) Sredstva za sanaciju i restrukturiranje privrednih subjekata i pomoć privrednim subjektima u poteškoćama, obezbjeđuju se u budžetu Kantona.

(3) Sredstva za kupovinu dionica ili udjela u privrednim društvima obezbjeđuju se iz budžeta Kantona.

##### **Član 4.**

##### **(Način vođenja sredstava)**

Sredstva iz člana 3. stav (1) ovog zakona prikupljaju se na posebnom podračunu u okviru Jedinstvenog računa trezora odvojeno prema vrstama, a odobravaju se se u skladu sa posebnim odlukama Vlade Tuzlanskog kantona (u daljem tekstu: Vlada Kantona).

##### **Član 5.**

##### **(Namjena sredstava)**

(1) Sredstva iz člana 3. stav (1) ovog zakona se koriste za potpunu ili djelimičnu refundaciju poreza i doprinosa za nova zapošljavanja na području Kantona.

(2) Sredstva iz člana 3. stav (2) ovog zakona koriste se u skladu sa Zakonom o državnoj pomoći ("Službeni glasnik Bosne i Hercegovine", broj:10/12) i Uredbom o namjeni, kriterijima i uslovima za dodjelu državne pomoći u Federaciji Bosne i Hercegovine

("Službene novine Federacije Bosne iH", broj: 99/13).

(3) Sredstva iz člana 3. stav (3) ovog zakona koriste se u skladu sa Zakonom o investiranju javnih sredstava ("Službene novine Fedearcije Bosne i Hercegovine", broj: 77/04 i 48/08), Zakonom o tržištu vrijednosnih papira ("Službene novine Federacije Bosne i Hercegovine", broj: 85/08 i 109/12) i Zakonom o privrednim društvima ("Službene novine Federacije Bosne i Hercegovine" broj: 23/99, 45/00, 2/02, 6/02, 29/03, 68/05, 91/07, 84/08, 88/08, 79/09, 63/10 i 75/13).

## **Član 6.**

### **(Korisnik sredstava)**

(1)Korisnik sredstava iz člana 3. stav (1) ovog zakona može biti privredni subjekt čije je sjedište na području Kantona i ispunjava druge uslove utvrđene propisom Vlade Kantona.

(2) Korisnik sredstava iz člana 3. stav (2) i (3) ovog zakona može biti privredni subjekt čije je sjedište na području Kantona.

(3)Korisnik sredstava iz člana 3. stav (1) ovog člana ne može biti:

- a) pravno lice koje nije izmirilo obaveze po osnovu poreza i doprinosa,
- b) koristilo poticaje u skladu sa ovim zakonom u prethodnom period, a nije povećalo broj zaposlenika,
- c) smanjilo broj zaposlenika prije podnošenja zahtjeva za dodjelu poticaja, u periodu utvrđenom propisom Vlade Kantona.

## **Član 7.**

### **(Nadležnost)**

Ministarstvo razvoja i poduzetništva Tuzlanskog kantona (u daljem tekstu: Ministarstvo) je nadležno za:

- a) realizaciju odluka o odobravanju sredstava sa posebnog podračuna iz člana 4. ovog zakona,
- b) analizu i procjenu u vezi sa projektima i programima/projektima novog zapošljavanja, ulaganja u privredu i socijalnog zbrinjavanja,
- c) nadzor nad korištenjem sredstava iz člana 3. ovog zakona,
- d) saradnju sa nadležnim organima i institucijama u postupku ostvarivanja prava novog zapošljavanja, ulaganja u privredu i socijalnog zbrinjavanja,
- e) i druge poslove u skladu sa zakonom i propisima donesenim na osnovu zakona.

## **Član 8.**

### **(Podzakonski akti)**

Obaveze korisnika, uslovi koji trebaju ispunjavati korisnici da bi dobili sredstva, kriteriji i postupak za dodjelu sredstava u svrhe iz člana 5. stav (1) ovog zakona, instrumenti obezbjeđenja, način prikupljanja dobrovoljnih priloga zaposlenih lica, način kontrole namjenskog korišćenja sredstava, kao i ostala pitanja vezana za provođenje odredbi ovog zakona uređuju se propisom koji donosi Vlade Kantona na prijedlog resornog ministarstva.

## **Član 9.**

### **(Instrumenti obezbjeđenja)**

Prilikom zaključenja ugovora između korisnika poticaja u zapošljavanju i Kantona iz člana 5. stav (1) ovog zakona, korisnik je obavezan dostaviti odgovarajuće instrumente obezbjeđenja.

### **III NADZOR**

#### **Član 10.**

##### **(Upravni nadzor)**

Nadzor nad provođenjem ovog zakona i propisa donesenih na osnovu ovog zakona vrši Ministarstvo.

#### **Član 11.**

##### **(Inspekcijski nadzor)**

Inspekcijski nadzor nad provođenjem ovog zakona i propisa donesenih na osnovu ovog zakona vrši nadležna inspekcija.

### **IV PRIJELAZNE I ZAVRŠNE ODREDBE**

#### **Član 12.**

Propis iz člana 8. ovog zakona Vlada Kantona će donijeti u roku od 30 dana od dana stupanja na snagu ovog zakona.

#### **Član 13.**

##### **(Stupanje na snagu)**

Ovaj zakon stupa na snagu danom objavljivanja u "Službenim novinama Tuzlanskog kantona".

**Bosna i Hercegovina**  
**Federacija Bosne i Hercegovine**  
**TUZLANSKI KANTON**  
**Skupština**

**Predsjednik**  
**Skupštine Tuzlanskog kantona**  
**Sladan Ilić v.r.**

**Broj:**  
**Tuzla,**

## **O b r a z l o ž e n j e**

### **I USTAVNI OSNOV**

Ustavni osnov za donošenje ovog zakona sadržan je u odredbama člana 24. stav 1. tačka c) Ustava Tuzlanskog kantona kojim je utvrđena nadležnost Skupštine Kantona za donošenje zakona i drugih propisa neophodnih za izvršavanje nadležnosti Kantona.

### **II RAZLOZI ZA DONOŠENJE ZAKONA**

Trenutno na području Kantona po podacima Federalnog zavoda za zapošljavanje imamo oko 99.536,00 lica na evidenciji Službe za zapošljavanje. Takođe, za veliki broj lica koja su u radnom odnosu godinama nisu uplaćivani porezi i doprinosi.

Cilj Vlade Tuzlanskog kantona je da se podstakne zapošljavanje radnika na području Tuzlanskog kantona i time smanji stopa nezaposlenosti. Namjera je, takođe da se iz sredstava predviđenih ovim zakonom podstakne pokretanje proizvodnje i započne rješavanje nagomilanih problema vezanih za status radnika u privrednim društvima u kojima nije moguće trenutno pokrenuti proizvodnju. Prema Poslovniku Skupštine Tuzlanskog kantona, po hitnom postupku može da se donese zakon kojim se uređuju odnosi i pitanja za čije uređivanje postoji neodložna potreba i ako bi donošenje zakona u redovnom postupku moglo da izazove štetne posljedice za društvene interese u Kantonu.

Polazeci od stanja na području Kantona, smatramo da su ispunjeni uslovi da se ovaj zakon, shodno članu 146. i 147. Poslovnika Skupštine Tuzlanskog kantona, donese u hitnom postupku.

### **III OBJAŠNJENJE POJEDINIH PRAVNIH RJEŠENJA**

Član 1. definiše predmet zakona, kojim se utvrđuju izvori sredstva za poticaje u zapošljavanju i ulaganje u privredne subjekte kao i socijalno zbrinjavanje zaposlenika u privrednim subjektima u kojima trenutno nije moguće pokrenuti proizvodnju.

Član 2. definiše cilj zakona, a to je smanjenje nezaposlenosti i pokretanje proizvodnje na području Kantona, kao i socijalno zbrinjavanje zaposlenika u privrednim subjektima u kojima trenutno nije moguće pokrenuti proizvodnju.

Član 3. utvrđuje izvore sredstava, a to su dobrovoljne donacije zaposlenih i budžetska sredstva.

Član 4. propisuje da se sredstva iz ovog zakona vode na posebnom podračunu u okviru JRT odvojeno prema vrstama.

U članu 5. se utvrđuje namjena sredstava.

U članu 6. je definira ko može biti, odnosno ko ne može biti korisnik sredstava.

Članom 7. utvrđena je nadležnost Ministarstva razvoja i poduzetništva Tuzlanskog kantona u pitanjima uređenim ovim zakonom

Članom 8. propisano je da se podzakonskim aktom Vlade Kantona urede pitanja kao: obaveze korisnika, uslovi koji trebaju ispunjavati korisnici da bi dobili sredstva, kriteriji i postupak za dodjelu sredstava u svrhe iz člana 5. ovog zakona, iznos i dinamika isplate, instrumenti obezbjeđenja, način prikupljanja dobrovoljnih priloga zaposlenih lica, način kontrole namjenskog korišćenja sredstava, kao i ostala pitanja vezana za provođenje odredbi ovog zakona.

Član 9. propisuje obavezu da se kod zaključivanja ugovora između korisnika poticaja u

zapošljavanju i Kantona od korisnika obavezno zahtijeva da dostavi odgovarajuće instrumente obezbjeđenja

Članovi 10. i 11. utvrđuju nadležnost za vršenje upravnog i inspekcijskog nadzora nad provođenjem ovog zakona i propisa donesenih na osnovu ovog zakona.

Članom 12. je propisana obaveza Vlade Kantona da pozakonske propise za provođenje ovog zakona donese u roku od 30 dana od dana stupanja na snagu ovog zakona.

#### **IV FINANSIJSKA I DRUGA SREDSTVA I NAČIN NJIHOVOG OBEZBJEĐENJA**

Za provođenje ovog zakona biće potrebno obezbijediti finansijska sredstva. Sredstva se sastoje iz dvije komponente i to: sredstva solidarnosti prikupljena od dobrovoljnih priloga zaposlenih osoba na području Kantona i sredstva iz budžeta Kantona i drugih izvora. Sredstva će se voditi na posebnom podračunu JRT kao namjenska sredstva.

**PREDLAGAČ:  
VLADA TUZLANSKOG KANTONA**